



MANNRÉTTINDASKRIFSTOFA ÍSLANDS
ICELANDIC HUMAN RIGHTS CENTRE

Reykjavík, 13. mars 2018.

Alþingi
Nefndasvið
Austurstræti 8-10
150 REYKJAVÍK

Umsögn Mannréttindaskrifstofu Íslands um frumvarp til laga um breytingu á lögum um atvinnuleysistryggingar nr. 54/2006 (bótaréttur fanga), þskj. 48, 48. mál.

Mannréttindaskrifstofa Íslands (MRSÍ) hefur fengið ofangreint frumvarp til umsagnar. Með frumvarpinu er lagt til að fangar eigi rétt til atvinnuleysisbóta að afplánun lokinni hafi þeir, samkvæmt vottorði frá fangelsismálayfirvöldum, stundað vinnu, nám eða starfsþjálfun sem í boði er innan viðkomandi fangelsis til samræmis við lög um fullnustu refsinga. Jafnframt er lagt til að leggja ávinnslu vegna þess tímabils sem einstaklingur situr í gæsluvarðhaldi eða afplánar refsivist og stundar vinnu, nám eða starfsþjálfun til samræmis við lög um fullnustu refsinga, að jöfnu við ávinnslu skv. 15. gr. laga nr. 54/2006 við útreikning á tryggingarhlutfalli.

MRSÍ styður frumvarpið og telur enda mun meiri líkur á því að fangi, sem er í virkri atvinnuleit og nýtur atvinnuleysisbóta, nái að snúa við blaðinu og komast inn í samfélagið sem nýtur þjóðfélagsþegn. Rétt er að benda á 6. gr. alþjóðasamnings Sameinuðu þjóðanna um efnahagsleg, félagsleg og menningarleg réttindi, sem tryggir öllum rétt til vinnu og skulu aðildarríki gera viðeigandi ráðstafanir til að tryggja þann rétt. Enn fremur segir í 9. gr. samningsins að allir eigi rétt á félagslegu öryggi og 11. gr. kveður á um rétt til viðunandi lífsafkomu. Með því að tryggja fanga rétt til atvinnuleysisbóta, svo hann geti framfleytt sér á meðan hann er í atvinnuleit er því liður í þeirri viðleitni að tryggja honum viðunandi lífsafkomu og tækifæri til að lifa með mannlegri reisn.

Virðingarfyllt,

f.h. Mannréttindaskrifstofu Íslands

Margrét Steinarsdóttir

framkvæmdastjóri